

## Ho Tloha Sephiring ho ea Tšenolong



---

### SABATHA MANTSIBOEA

#### **Bakeng sa Boithuto ba Beke Ena Bala:**

Dan. 2:1–16, Liketso 17:28, Dan. 2:17–49, Lipesalema 138, Johanne 15:5, Deut. 32:4, 1 Pet. 2:4.

#### **Teman'a Khopolo:**

“Daniele a re: Ho bokoe lebitso la Molimo ka mehla le mehla, hobane e fela o na le bohlale le matla!” (*Daniele 2:20*).

**M**etsing a likolohileng Greenland ke lithaba tsa leqhoa ka bohola ba tsona ka ho fapana. Ka nako tse ling maqhoa a manyane a phalla ka tsela e le ‘ngoe ha a maholo a phalla ka tsela e le ‘ngoe e khahlanong le eo. Se etsahalang ke hore meea e fokang kaholimo e phallisa maqhoa ana a manyane, ha maqhoa a maholo a phallisoa ke maqhubu a tebileng a leoatle. Ha re talima ho phahama le ho oa ha mebuso nalaneng eohle, ke boemo bo tšoanang le ba meea e fokang kaholimo le maqhubu a tebileng a leoatle. Meea e tšoantša sohle se fetohakang se sa lebellheng joalo ka mehopolo ea motho. Empa tšebetsong hammoho le meea ena le litsokotsane ke matla a mang, a bileng a leng matla ka ho fetisa a tšoanang le maqhubu a leoatle. Kannete-nete ke tšisinyeho ea morero oa bohlale le borena ba Molimo. Joalo kaha Ellen G. White a boletse, “Joalo ka linaleli selikalikoeng se sehlohali sa tsela eo li e behetsoeng, merero ea Molimo ha e tsebe ho potlaka kapa ho lieha.”—*The Desire of Ages*, leq. 32. Leha ho phahama le ho oa ha mebuso, mehoo, le mekha ea lipolotiki ho bonahala ho etsahala ka takatso le kelello ea motho feela, Daniele 2 e bontša hore ke Molimo oa leholimo eo ka sebele a tsamaisang nalane ho ea fihla pheletsong ea eona e khola.

*\*Ihute thuto ea beke ena ho lokisetsa Sabatha sa la 18 Pherekhong.*

## Bohaufi ba Molimo

**Bala Daniele 2:1–16. Ke tlokotsi e fe eo ba-Heberu ba tobanang le eona ka lebaka la toro eo Jehova a e fileng morena?**

---

Litoro li ne li nkeloa hloohong haholo lefatšeng la mehlang ea khale. Ha toro e ne e bonahala e tšosa, e ne e atisa ho supa kotsi e tlang. Ka hona, ho ea utloisiseha hore ke hobaneng ha Nebukadesare a tšoenyehile ka toro eo, ka bomalimabe, a seng a sa e hopole. Ba bohlale ba Babilona ba ne ba lumela hore melimo e ka senola manollo ea litoro, empa torong ena e ho Daniele, ha ho seo ba bohlale ba ka se etsang hobane morena o lebetse toro. Ha e ne e ba ba bolelletsoe toro, ba ne ba tla fana ka manollo ea eona ho khahlisa morena. Empa boemong bona bo thata, ha bo ramahlale ba litoro ba sitoa ho bolella morena toro ea hae, ba tlamaha ho amohela hore “ha ho e mong ea ka e senolelang morena, ha e se melimo e sa ahang har’a batho” (Dan. 2:11).

Ka lebaka la ho imeloa ke ho khathatseha, morena o laela hore ba bohlale bohle ba Babilona ba bolaoe. Bokhopo bo joalo bo ne bo tloaelehile lefatšeng la khale. Mehloli ea nalane e paka hore, morero oa sekhukhu, Dariuse I o ile a laela hore linohe tsohle li bolaoe, Xerxes a bolaea lihahi tse neng li ahile borokho bo ileng ba oa. Ha Nebukadnesare a fana ka taelo ea hae, Daniele le balekane ba hae ba ne ba sa tsoa qeta khoetliso ea bona ‘me ba qeta ho amoheloa har’a ba bohlale ba morena. Ka lebaka lena, le bona ba angoa ke taelo ea morena. Hantle-ntle puo ea teng e supa hore taelo e ne e lokela ho qala hang-hang, ‘me Daniele le metsoalle ea hae ba ne ba lokela ho ba ba latelang. Empa Daniele, ka “bohlale le ka kutloisiso” (Dan. 2:14), o atamela Arioke, monna eo taelo ea polao e leng boikarabellong ba hae. Qetellong Daniele a kopa ho fuoa nako ke morena ka sebele hore ba tle ba fumane tharollo ea sephiri sa toro eo. Se thahasellisang ke hore, leha morena a ne a nqositse ba bohlale ka hore ba leka ho batla ekeletsoa “nako,” o fana ka “nako” eo Daniele a e kopang. Ka ho hlaka Daniele o lumellana le ba bohlale hore ha ho motho ea ka rarollang sephiri se joalo, empa moprofeta o tseba ka Molimo ea ka senolang likateng le manollo ea toro eo.

**Ba Thuto-molimo ba bua ka “bohaufi” ba Molimo, hore leha a fapane le tlhaho, Molimo a ka ba haufi le eona. Taba ea hore Molimo o file morena Nebukadnesare toro e re bolella eng ka bohaufi ba Molimo ho rona?(Sheba le Liketso 17:28.)**

---

## Thapelo

Hang Daniele a nka metsoalle ea hae ho ea nakong ea thapelo, a ba hlalosea hore ba tlo bolaoa haeba Molimo a sa senole toro. Nako le nako ha re tobana le bothata, re lokela ho ananela hore Molimo oa rona o moholo ho lekana hore a rarolle le liqholotso tse sa rarolleheng.

### **Bala Daniele 2:17–23. Mefuta e ‘meli ea lithapelo tse rapetsoeng moo ke e fe?**

---

---

---

Khaolong ena ho buuo ka mefuta e ‘meli ea thapelo. Ea pele ke thapelo eo ho eona Daniele a kopang Molimo hore a senole toro le manollo ea eona (Dan. 2:17–19). Mantsoe a thapelo ena ha a fanoa, empa re bolelloa hore Daniele le metsoalle ea hae “[ba] kopa mohau oa Molimo oa leholimo bakeng sa sephiri seo, hore Daniele le balekane ba hae ba se ke ba felisoa le ba bohlae ba bang ba Babilona” (Dan. 2:18). Ha ba ntse ba rapela, Molimo a arabela kopo ea bona a senola toro ea morena le manollo ea eona. Re ka ba le tiisetso ea hore ha re kopa “mehauhelo ho Molimo oa leholimo” le rona lithapelo tsa rona li tla arabeloa, leha e se ka tsela e bonahalang joalo ka ena mona, hobane Molimo oa Daniele ke Molimo oa rona le rona.

Ka lebaka la hobane Molimo a arabetse thapelo ea bona, Daniele le metsoalle ea hae ba kena thapelong ea teboho ka thabo e kholo. Ba leboha Molimo ka ho ba mohloli oa bohlae le ka ho ba taolong ea tlhaho le nalane ea lipolotiki. Ho na le thuto ea bohlokoa eo re ka ithutang eona mona. Ha re ntse re rapela re kopa lintho tse ngata ho Molimo, ke ha ngata ha kae re mo lebohang ka hore o arabetse lithapelo tsa rona? Boiphihlelo ba Jesu le balepera ba leshome bo fana ka setšoantšo se hlakileng sa ho hloka teboho ha batho. Har’ a ba leshome ba phekotsoeng, ke a le mong feela ea khutlang “ho tlotlisa Molimo” (Luka 17:18). Boitšoaro ba Daniele ha bo re hopotse feela ka bohlokoa ba teboho le thoris, empa bo senola le semelo sa Molimo eo re mo rapelang. Ha re rapela ho Eena, re ka mo tšepela ho etsa se molemong oa rona, kahona re lokela ho mo lebohla le ho mo rorisa kamehla.

**Bala Lipesalema 138. Ke eng seo u ka se nkang thapelong ee ea teboho se ka u thusang hore u be le teboho ho Molimo, ho sa natse maemo ao u leng har’ a oona?**

---

## Setšoantšo, Karolo ea Pele

**Daniele 2:24–30. Daniele e bua eng moo eo ho leng bohloka hore re e hopole kamehla? (Sheba le Johanne 15:5.)**

---

E le ho arabela thapelo, Molimo o senola toro le manollo ea eona. ‘Me Daniele ha a qeaqee ho bolella Morena hore tharollo ea sephiri e tsoa ho “Molimo oa leholimo.” Hape, pele a fana ka tlaho ea toro le manollo ea eona, Daniele o bua ka mehopolo e sa buuoang ea Morena le khathatseho ea hae ha morena a ntse a le litaong tsa hae a hloaetse. Litaba tsena tse hlalolang maemo ana li ntšetsa pele ho paka ka bonnete ba molaetsa, hobane litaba tse joalo tse neng li tsejoa ke morena feela li lokela li be li fihlile ho Daniele ka mohloli o kaholimo ho matla a botho. Empa ha Daniele a tsoela pele ho hlalosa toro, o ipheha kotsing ea ho baka tlokotsi e ‘ngoe, ka hobane toro ena hantle ha se litaba tse monate ho Nebukadnesare.

**Bala Daniele 2:31–49. Toro e re pheletso ea ‘muso oa Nebukadnesare ke e fe?**

---

Toro ke ea setšoantšo se sehlo se tšabehang seo hlooho ea sona e leng ea “khauta e tšekehileng sefuba le matsoho a sona e le a selifera, mpa le matheka a sona e le a koporo, meomo e le ea tšepe, maoto ka ‘nqá e ‘ngoe e le a tšepe, ka ‘nqá e ‘ngoe e le a letsopa” (Dan. 2:32, 33). Khabareng lejoe “la thesela setšoantšo maotong a sona” (Dan. 2:34), ‘me setšoantšo kaofela ha sona sa senyeha ‘me sa fefoha joalo ka mooko ha o fefoloa ke moea. Daniele a hlalosa hore litšepe tsena tse fapaneng li tšoantša mebuso e tla latellana joalo hoesa fihla pheletsong ea nalane. Ho Nebukadnesare, molaetsa o hlakile: Babilona, ka matla a eona le khanya, e tla feta ‘me e nkeloe sebaka ke ‘muso o mong, o tla lateloa ke e meng ho fihlela ho fihla ‘muso o fapaneng le e meng ka botlalo’me o nkela eo eohle sebaka: ‘Muso oa Molimo oa ka ho sa feleng.

**Talima kamoo lintho tsa batho e leng tsa nakoana ‘me li fetang ka teng. Taba ee e lokela ho re ruta eng ka tšepo e khoho eo re nang le oena ho Jesu, ‘me Jesu feela (see John 6:54, 2 Cor. 4:18)?**

---

## Setšoantšo, Karolo ea Bobeli

**Bala toro hape le manollo ea eona (Dan. 2:31–49). See se re ruta eng ka tsebo ea Molimo ea tse tlang ho etsahala nalaneng ea lefatše?**

---

---

Boprofeta bo bonahatsoang ke toro ea Nebukadnesare bo fana ka tlhaloso e akaretsang ea boprofeta ‘me bo sebetsa e le sekala seo ka sona re ka atamelang boprofeta bo tebileng ba Daniele 7, 8, le 11. Hape, Daniele 2 ha se boprofeta bo nang le liphelelo. Ke boprofeta ba bofelo: tlhaloso e topileng ea seo Molimo a se boneng e sa le pele ‘me seo a tlang ho se hlalisa nakong e tlang.

1. Hlooho ea Khauta e emetse Babilona (626–539 B.C.). kannete, ha ho tšepe e ‘ngoe e ka emelang matla le leruo la ‘muso oa Babilona ho feta khauta. Bibe e o bitsa “motse oa khauta” (Isa. 14:4) le “senoelo sa khauta letsohong la Jehova” (Jer. 51:7; bapisa le Tšenolo 18:16). Ranalane ea khale Herodotus o tlaleha hore motse oo o ne o khabisitsoe ka khauta e ngata.

2. Iifuba le matsoho a selifera li emetse Ba-Mede le Ba-Persia (539–331 B.C.). joalo kaha selifera se le katlase ho khauta ka boleng, ‘muso oa Ba-Mede le Ba-Persia ha o ea ka oa fihlela letlotlo la ‘muso oa Babilona. Ho tlatselisa moo, selifera e ne e le letšoao le lokelang ‘muso oa Ba-Mede le Ba-Persia hobane ba ne ba sebelisa selifera likhafeng tsa bona.

3. Mpa le matheka a koporo a tšoantša Gerike (331–168 B.C.). Ezekiele 27:13 e bontša Ba-Gerike ba ne ba hoeba ka lijana tsa koporo. Masole a ba-Gerike a ne a tsejoa ka lihlomo tsa bona tsa koporo. Liheleme tsa bona, lithebe, le lilepe tsa ntoa e ne e le tsa koporo. Herodotus o re bolella hore Psammetichus I oa Egepete ha a bona bakhothotsi ba leoatleng [pirates] ba ma-Gerike ba hlasela Egepete o ile a bona phethahatso ea bopofoteta bo neng bo ile ba phetoa khale “banna ba koporo ba tsoang leoatleng.”

4. Meomo ea tšepe ka nepo e tšoantša Roma (168 B.C.–A.D. 476). Joalo kaha Daniele a hlalositse, tšepe e ne e tšoantša matla a robakanyang a ‘muso oa Roma, o nkileng nako e telele ho feta mebuso e tšileng pele ho oona. Tšepe e ne e le setšoantšo se nepahetseng ho tšoantša ‘muso oo.

5. Maoto ka ‘nqá e ‘ngoe e le a tšepe ka ‘nqá e ‘ngoe e le a letsopa a tšoantša Europo e arohaneng (A.D. 476–Ho Tla ha Bobeli ha Krete). Motsoako oa tšepe le letsopa o fana ka setšoantšo se loketseng sa se ileng sa etsahala kamorao ho ho oa ha ‘muso oa Roma. Leha ho entsoe liteko tse ngata ho kopanya Europo, ho tloha ka ho nyallana mahareng a marena ho fihlela ka Kopano ea Europo [European Union], esale ho le teng likarohano le ho se lumellane, ‘me ho ea ka boprofeta, ho tla lula ho le joalo ho fihlela Molimo a theha ‘muso oa Hae o sa feleng.

## Lejoe

**Bala Daniele 2:34, 35, 44, 45. Litemana tsee li re ruta eng ka pheletso ea lefatše la rona?**

---

‘Moko taba oa toro o holim’a tse tlang ho etsahala “mehleng e tlang ho tla” (Dan. 2:28). Hore na e bile matla ‘me ea rua ha kae, mebuso eo ea tšepe (le letsopa) ha se letho ha e se feela selelekela sa ho thehoa ha ‘muso oa lejoe. Leha ho isa boemong bo itsang tšepe le letsopa e ka ba lihlahisoa tsa bohlahisi ba motho, lejoe le torong le hlaha le sa angoa ke matsoho a motho. Ka mantsoe a mang, leha mebuso e fetileng ka bo mong ba eona e fihle pheletsong, ‘muso o tšoantšoang ke lejoe e tla ba oa ka ho sa feleng. Papiso ea lejoe, nakong eo, e ne e tšoantša Molimo (Mohlala, Deut. 32:4, 1 Sam. 2:2, Lipes. 18:31), ‘me ka mokhoa o tšoanang lejoe le ka emela Mesia (Ps. 118:22; 1 Pet. 2:4, 7). Ka mokhoa o joalo, ha ho na ntho e loketseng ho tšoantša ‘muso oa Molimo oa ka ho sa feleng joalo ka lejoe.

Ba bang ba re ‘muso oa lejoe o ile oa thehoa nakong ea bosebeletsi ba Jesu lefatšeng, ‘me khaso ea evangeli e ema e le sesupo sa hore ‘muso oa Molimo o se o hapile lefatše lohle. Feela ‘muso oa lejoe o tla feela kamorao ho hore mebuso e mene e oele le nalane ea motho e fe e fihlile nakong ea mebuso e arohaneng, e tšoantšoang ke maoto le menoana ea setšoantšo. Taba eo e hlakola phethahaso ea mongoaha-khoho oa pele, hobane bosebeletsi ba Jesu lefatšeng bo etsahetse nakong ea puso ea Roma, ‘muso oa bone.

Empa lejoe le fetoha thaba. Ke hore, “lejoe le neng le thesetse setšoantšo, la fetoha thaba e khoho la tlala lefatše” (Dan. 2:35). Thaba e joalo ka ena e tliša monahano oa Thaba ea Sione, sebaka seo tempele ea Molimo e ne e lutse ho sona, e le sesupo se tiileng sa ‘muso oa Molimo lefatšeng nakong ea Testamente ea Khale. Se thahasellisang ke hore, lejoe le khephohileng thabeng le fetoha thaba ka bolona. Thaba ena, eo ho latela temana e seng e ntse e le teng, e lokela e be e supa Sione ea leholimo, sehahalelo sa leholimo, moo Krete a tla tsoa teng ho tla theha ‘muso oa ka ho sa feleng. ‘Me ‘muso ona o tla fumana phethahatso ea oona ho Jerusalema e tla theoha leholimong (Tšen. 21:1–22:5).

**Daniel 2 e nepile mebusong ena kaofela ho fihlela mona. Ke hobane, ha ho le joalo, e le bohale ho tšepa boprofeta ba eona ka ‘muso oa ho qetela, ‘muso oa Molimo oa ka ho sa feleng? Ke hobaneng ha ho se na kelello ho se lumele boprofeta boo?**

## Ho Ithuta Haholoanyane:

Ho bohlokoa ho tsoaea hore setšoantšo sa Daniele 2 se entsoe ka khauta le selifera, e leng litšephe tse amanang le matla a moruo. Hape setšoantšo se entsoe ka koporo le tšephe, tse sebelisoang ho etsa lisebelisoa le libetsa, le letsopa, le neng le sebelisoa khale ho etsa lingoloa le lisebelisoa tsa hae. Ka hona, setšoantšo se bontša botho le likatleho tsa bona. Ka ho nepisisa, litho tse hlakileng tsa setšoantšo li bontša tlhahlamano ea mebuso le karohano ea ho qetela e tla rena matsatsing a ho qetela a nalane ea motho. Lejoe, leha ho le joalo, le hlaha e le ntho e sa etsoang ka “matsoho a motho” (Dan. 2:45), sehopotso se matla sa pheletso e kaholimo ho matla a motho e tla tla likatlehong tse na tsa motho tsa nakoana. Leha ho le joalo, “ka chalimo ea leihlo la motho le feela, nalane ea motho e ka bonahala e le morusu oa phapanyetsano ea matla. . . Daniele e re tiisetsa hore kamor’a tse na tsohle ho eme Molimo, a shebile tlase ho eona ‘me a ntse a tsamaea kahare ho eona ho phethahatsa seo a se bonang se lokela.”—William H. Shea, *Daniel: A Reader’s Guide* (Nampa, ID: Pacific Press, 2005], leq. 98.

## Lipotso tsa Puisano:

1. Ho monate ha ka kang ho tseba hore har’a mefere-fere le mahlomola a lefatše lena, Molimo o taolong ea tsohle ‘me o tla tlisa tsohle pheletsong e khanyang. Ho fihlela nakong eo, boikarabelo ba rona ho ke bo fe ho batla ho etsa botle bohle bo ka re thusang ho fokotsa mohlomola a teng lefatšeng lee le oeleng?
2. Re hlalosa joang Daniele le baholehoa ba sebetsang ka katamelo e kholo hape ka botšephe le moetapele oa mohedene ea bakileng tšenyō e kholo sechabeng sa habo Daniele?
3. Joalo kaha re bone, ba bang ba re lejoe le khophohileng e se ka matsoho a motho le supa khaso ea evangeli ka lefatše lohle. Taba eo ha ea nepahala ka mabaka a ‘maloa, ho kenyelletsa le seo Daniele 2:35 e se bolelang, e leng hore lejoe le tla thuhakanya lichaba tse fetileng le hore “li ile tsa fefoloa ke moea ‘me ha lia ka tsa hlola li e-ba teng.” Tseo ha lia etsahala kamor’a Sefapano. Ho feta moo, liteko tse ling tsa ho bapisa lejoe le kereke li hloleha ho tsoaea hore ‘muso oa lejoe o nka sebaka sa mebuso eohle ea motho. Ke ‘muso o akaretsang lefatše lohle. Ka hoo, ke ho tla ha Jesu ha bobeli feela ho ka tlising liketsahalo tseo tse bontšoang e le sehlohlolo sa boprofeta ba toro ena. Ke hobaneng, ha ho le joalo, ho tla ha Jesu e le bona feela botoloki bo utloahalang ba seo lejoe le se etsang matsatsing a ho qetela?